



John Carter Brown.







Not on Germany
Ent. p. 39.

c

236

I V L I I
CAESARIS STELLAE
NOBILIS ROMANI
COLVMBEIDOS
Libri Priores Duo.

AD PHILIPPVM AVSTRIVM
PHILIPPI II. REGIS CATH. F.
HISPANIARVM ET INDIARVM
PRINCIPEM.




SVPERIORVM PERMISSV.

R O M A E,
Apud Sanctium, & Soc.
M D. X C.

IVLLI
CAESARIS STELLAE
NOBILIS ROMANI
COLVMBEIDOS

Libri Pictoris Duo.
AD PHILIPPVM AVSTRIVM
PHILIPPI H. REGIS CATHE.
HISTORIARVM ET INDIARVM
PRINCIPVM.



SVPERIORVM PERMISSVM.

R O M A E
apud Sanguinem. Et Soc.
M. D. X. C.

FRANCISCVS

BENCIVS

E' SOCIETATE IESV

Erudito Lectori S. D.

TSI COLVMBEIDOS libri duo,
quos IVLIUS CAESAR STEL-
LA sexto ab hinc anno à se compositos
nunc primum edidit, ij sunt, vt gratulari
potius, & gratias agere omnes auctori de-
beant, quòd gustum aliquem dederit to-
tius operis, quàm quærere cur non expe-

ctarit, dum totum daret: occurram tamen admirationi aliquo-
rum, qui accipientes quod datur, eius specie allecti totum
accipere maluissent. Atque id faciam auctore ipso approban-
te. Scripserat hos duos libros, excellentis ingenij, & in arte
poetica suam supra ætatem, & admirationem omnium exer-
citatus adolescens, cùm annum non dum ageret vigesimum:
atque, vt est suarum rerum non magnus admirator, voluit eo
in labore antequam procederet, expiscari iudicium aliorum.
Ostendit igitur, vt eum primò nominem, cui primum osten-
dit, etsi suo iure primus omnium erat nominandus, M. AN-
TONIO MVRETO. exemplum misit ad lumen illud al-

terum litterarum, quod peræquè lugemus extinctum, P E-
TRVM VICTORIVM. Ac ne solum mortuos memo-
rem, misit ACADEMIAE FLORENTINAE, am-
plissimis viris, & præstantissimis ingenijs instructissimæ: Inspi-
ciendum dedit duobus Petris, nostri sæculi ornamentis: A N-
GELIO BARGAEO, & MAGNO. FVLVIO VR-
SINO, viro optimo, longeq̃ue doctissimo. I O A N N I
TONSO in omni genere sermonis, & humanitatis perfe-
cto. ANTONIO QVAERENGO cuius magnum, &
graue debet esse iudicium, ea videlicet in arte, in qua ipse plu-
rimum præstat. ergo his inspicendum. audiendum MARIO
CVRTIO, qui oculorum cæcitatem intelligentiæ acumi-
ne, maximarumq̃ue rerum cognitione compensat. ac, ne om-
nes numerem: quos aut Romæ esse compererat in hac re in-
telligentes (sunt autem hac ætate permulti) aut in Italia, eos
volebat esse talis scriptionis arbitros: ne, aut ingestis amico-
rum laudibus, aut ipsius feruore ætatis rapi videretur. Inuen-
tus est nemo, qui non exquisitissimis verbis extulerit inge-
nium poetæ, ipsosq̃ue versus ita commendarit, vt modestiam
suam præstare debuerit ingenuus adolescens, in ijs audiendis,
quæ de se dicerentur. Non faciam hoc loco, vt adijciam tanto-
rum virorum testimonio sententiam meam: ne videar eum
laudando suffragari mihi, cuius disciplinæ alumnus aliquan-
do obtigit maior magistro. Cum hæc ita essent, iamq̃ue tam
præclari poematis spargeretur fama, vt magna pars virorum
in hac Vrbe Principum peterent eius sibi fieri copiam: ma-
gnus ille ALEXANDER FARNESIVS Cardinalis,
scientissimus iudex, patronusq̃ue munificentissimus erudito-
rum, in suburbana sua villa cum legisset, vsque adeò proba-
uit, vt in Hispaniam ad Serenissimum PHILIPPVM Ca-
tholici Regis filium sua sponte curarit perferendum. Hinc
autem eæ litteræ venerunt à summa doctrina, & prudentia præ-
dito GARSIA LOAISA, qui à Rege sapientissimo ad-
motus est spei Principis omnium maximi, vt non fuerit sine
suspicio-

suspicionē pertinaciæ editio supprimenda. Ex quo illud etiā
STELLA assequetur, quod ex hoc specimine operis, in
quo perficiendo nunc progreditur, & eliciet sensum aliorum,
quos non potuit consulere, & melius multo intelliget, quid
in reliquo sequendum, quid fugiendum esse videatur. Ardet
certē iuuenis, & iure id quidem, incredibili desiderio Regis
inuietissimi, quo maxime stat Christiana Respublica, Augu-
stæ eius sobolis, quæ nunc surgit, tanto præsertim fulta insti-
tutore, SPES ALTERA RERVM. dominatricis de-
nique HISPANIAE, laudes, si non pro merito, saltem
pro studio celebrandi. quod cum tota vita se facturum polli-
cetur, tum hac ætate, in qua nunc est, ita præstat, atque olim
in minore tam diligenter præstitit, ut in tam vberi argumen-
to, quamlibet magna à tam felici ingenio sperare debeamus.
Et si hoc ipsum, quod nunc præbetur gratia exempli, tale est,
ut ad laudis æternitatem satis esse possit. Quod tamen ipse,
quæ est animi magnitudine, non tam vult esse præteritorum
præmium, quàm futurorum incitamentum. est enim proprium
quoddam illustri STELLARVM familiæ, ut ingenio va-
leant, & poetico artificio. Neque id tantum dictum propter
IOANNEM BAPTISTAM qui est Pontifici Maximo
à supplicibus libellis referendis, IULII CAESARIS ger-
manum fratrem, virum cum reliquis virtutibus, tum poetica
laude ornatissimum: sed propter L. ARRVNTIVM
STELLAM. quem Papinius Statius in his studijs eminen-
tissimum vocat. Ab hoc enim ARRVNTIO STELLA
STELLAS ortos stirpe antiquissima, constans fama est, &
vero ab opinione eruditorum, grauibz innixa argumentis,
non abhorrens. & augebit nunc STELLA meus, quasi I V-
LIVM SIDVS, non in genere solum suo, sed & in Heroi-
corum poetarum, numerum stellarum. Recte enim poetæ om-
nes stellæ: qui inter omnes rerum auctores clarissime micant.
Itaque fulgebit semper (nec me amor fallit) ut nulla eum vel
inuidiæ nebula, vel temporis obscuratura videatur obliuio.

Crescet

Crescet eius splendor in dies magis, & ab hoc ipso poemate, quod nunc partim datur, partim promittitur, admirabile accipiet incrementum. Est enim ipsum (& speciem vides) factum quidem ad exemplar antiquorum, sed tale, ut exemplum sit futurum posteris, qui similia vel cupient, vel audebunt. Vale. E Collegio Romano.



AD GARSIAM
LOAISAM
PHILIPPI PRINCIPIS
INSTITVTOREM V. C.

Iulij Cæsaris Stellæ

ELEGIA.




EC potis optato pinus se nautica portu
Condere, ni felix per mare ventus agat :
Nec mea ad extremum se ferre Columbeis, illam
Ni patrocini prouehat aura tui ;
O' decus Hispanæ, spesque vna Loaisa fama,
Publica quo crescit fulta docente quies,
Et duce te pueros vincit puer, integer aui

Laude vir vt magnos vincet vtraque viros ;
Quod felix tandem est illo sub Rege futurus,
Debet præceptis orbis vterque tuis :
O quibus interea sese virtutibus auget
Innumeris, annos expleat ille pares.
Ergo me, captis quem spes promissa secundi
PRINCIPIS, iniustum sumere iussit onus,
Iure fone : primis maius quod molior annis,
PRINCIPIS in laudes omne mouetur opus :
Nam si, magna quibus sese domus Austria iactat,
Interdum veteres ille recenset auos,
Vt teneram incendant exempla domestica mentem,
Perque suæ longas Gentis it historias,
Occurrent FERDINANDVS, sexuque virago
Altior, inuictus par ISABELLA viro.
Catholici nomen quorum meruere labores,
Et pia pro sancta bella peracta Fide.
His olim auspiciis trans littora nota COLVMBVS

Inten-

Intentatum alijs primus iniuit iter,
 Et titulos tot per maria inuia vexit Iberos
 Victor, ad oppositi regna reposta poli,
 Non venti rabies, nec inhospitus aetheris ardor
 Magnanimum pelagi nec tenuere mina.
 Iuit, & ingentem Phæbi æmulus ambiit orbem,
 Et domito mundum iunxit vtrunque mari.
 Vix illum, innumeris licet aëre denatet alis,
 Fama per immensas fessa sequuta vias.
 Quem cartis intexam audax metuentibus atra
 Nocte tegi, ni me ludit honoris amor;
 Perpetuum vt longi monumentis insitus aui
 Floreat, & populi docta per ora volet.
 Viuet, & vt factis immanibus obruit omnes
 Prisca quot in lucem sacra dedere, viros,
 Sic non laude minor, cui nil annus auferat ætas,
 Alite forsan erit carminis ille mei.
 Et procerum pietas æterna micabit Iberum,
 Prima mihi à summo cura futura Duce:
 Extera tentantem pro Religione COLVMBVM
 Regna procul, quorum est sponte sequuta manus.
 Tu modo magnum vna decurre LOAIS A munus;
 Tuque PVER cæptis maxime dexter ades,
 Quem sapere ante annos mirata Hispania gaudet,
 Nec, tantum quo se Principe tollat, habet.
 Perge volens, & te Regi, quem nomine reddis,
 Redde PATRI factis, & pietate parem.



COLVM-

COLVMBEIDOS

Liber primus.



INVENTVM pugnata canopia
bella per orbem,
Magnanimumque Ducem, terris qui
primus Iberis,

Axis ad oppositi populos, ignota Quiqueia
Littora fecit iter, secretaque regna retexit.

Ille graues rerum constanti pectore casus
Pertulit, & magnos pelago, terraque labores,
Inceptis dum monstrum Erebi felicibus obstat,
Multaque bellando expertus, dum tecta locaret
Tuta suis, ritusque pios, moremque sacrorum
Cnderet, vnde nouas passim venerata per aras
In summos nunc relligio successit honores.

Tu modo, quæ iustos nunquam frustrata vocatus
Vota foues hominum, & promisso munere damnas,
Virgo Parens, sic te terra, cæliq. potentem
Agnoscat, Natique tui sub Rege PHILIPPO
Indus vterque pari veneretur numina cultu,
Affer opem, aspira que mihi, quodcunque Columbus
Gessit equis, & classe, tuum est: Te iusta iuuantem
Prelia sæpe graui rerum in discrimine sensit,

A

Te

COLVMBEIDOS

*Te duce durum vicit iter, trans solis, & anni
Ire vias ausus: Tu me tua dona canentem
Diuamone, cœptisque volens ingentibus adsis.*

*At tu magne Puer flos orbis, & ultima terris
Expectata quies: longo defessus ab ævo
Regnandum tibi cum Genitor concesserit orbem:
Excipe, puberibus quæ prima sacramus ab annis,
Munera deuota monumenta, & pignora mentis.
Tempus erit, cum facta Patris miranda nouantem
Carmine te maiore canam, quandoque feroces
Contuderis Turcas, & Regum colla minantum
Ad sacra templa trahes curru sublimis auito,
Innumerosque mari referes ab utroque triumphos:
Nunc tibi militiæ curas, dum mollior ætas
Inuidet: auspicij maiorum inuenta tuorum
Regna lege, & pugnanda animo iam concipe bella.*

*Soluerat Hispano iamdudum littore classis
Solis in occasum pelagi tentare latentes
Missa sinus, positasque alio sub sydere terras:
Intactas penitus terras, quas omnis iniquo
Damnatas æstu nequicquam credidit ætas,
Desertosque vacare locos, & inhospita regna:
Iamque supra Hesperidas varijs iactata periclis
Errabat pelago in magno: tamen omnia contra
Ventorumque minas, seuique incommoda cœli
Longum insistit iter, Dux tanta ad munera lectus*

Christoso-

Christophorus, cæptisque ardens audacibus instat.
Et iam auræ aspirant faciles, mirataque monstrum
Non prius incurvæ rostro diuisa carina
Subsidunt ultro, & motus freta cæcula ponunt:
Ipsi latantes ignoto corpore pisces
Emergunt pelago, nauesque attingere gaudent.

At contra diri longe regnator auerni
Inuidiæ stimulis, odioque agitatus, & ira;
Detegat Ausonius ne regna occulta Columbus
Antiquosque nouet ritus, melioraque gentes
Ad sacra conuersas lustralibus abluat undis;
Multa putat, si quâ properantem auertere classem
Possit ab incepto: velit æquora feruere flammis,
Astra tegi tenebris, cælum imbribus omne resolui;
Ipse inferre faces, dare noctem, immittere nimbos.
Sed quid agat? sedet hæc summo sententia Patri.
Flet tamen, & tandem hæc inuito ex ore profundit.

Ergo, ego quæ magnas Asiæ, Libiæque per vrbes
Tantum impensis operum Mahomete ministro
Damna dedi superis; victor pelagique, meique
Largius inuento Ligur hic modò sarciet orbe:
Quo solo amissi casum solabar Olympi.
Et patiar, cedamque libens? dent iura subactis
Christiada populis, ritusque, & sacra refigant,
Deturbentque solo fratrum simulacra meorum:
Illis credula plebs operosas erigat aras,

Illis vota dicet, terris expulsus, & alto
 Rex Erebi vacua regnabo inglorius aula,
 Et sat erit manes pœnis urgere nocentes:
 Qui toties superis hostem me inferre superbis
 Ausus, & indignans generis subeuntis honorem
 Eieci primos felici ab sede parentes,
 Vincar ego? atque meo memet Ligur arceat orbe?
 Non equidem, quod si mea tanta potentia non est
 Magna satis, spargã arma, serã noua crimina pugna,
 Tollam undas, cœlumque, Erebumque, orbemq; ciebo
 Gentis in inuisa excidium: pars lintea retro
 Vertat, & in Ligurem crudelibus ardeat iris,
 Totaque frangatur studia in discordia clāssis:
 Si pelago tamen infandas euadere naues
 Contigerit, partem arma ferant, partem hauriat ignis,
 Aegra neget victum tellus, nec fœdera seruent
 Indociles iuga ferre Indi, Dux ipse Columbus
 Aestuet externo venas incensus amore,
 Aut cadat ante diem, miseroque in funere secum
 Interrupta trahat funesti exordia facti:
 Sic tibi, sic leges alieno imponere Mundo
 Vane Ligur dabitur, nostrosque euertere cultus.

Dixit, & infrendens magno clamore sub auras
 Erigit immundo mixtas cum sanguine flammās,
 Talis odor, talis se faucibus egit ab atris
 Halitus, abruptis qualem eructare caminis

Aetna

*Aetna solet : iam se notas conuertit ad artes
Improbis, immanesque dolos in pectore versat.*

*Demens qui tantas incassum concipit iras
Dum superum sese committere viribus audet,
Nec meminit deiectum alto loca in infera cælo.*

*Continuo ruit ad naues, ubi multa querentem
Quod se vix notis iuuenem commiserit undis,
Et tot pertulerit duro sub Rege labores,
Burgensem videt Henricum; quem regna petendi
Numquam audit aprius, & adhuc sine nomine gentes
Vanus amor dubio suasit confidere ponto,
Nunc piget: ergo locum insidijs, tempusq; nocendo
Nactus atrox hostis furiales exuit artus,
Et caudam sinuosam, & vela nigrantia pennarum,
Ardentesque oculorum orbes, notumque colorem
Et vocem, & gressus vultumque effingit Iantis,
Sanguine quem iunctum Henrico, patriaq; creat
Nunc Burgos, olim Ausonijs clara Auca colonis;
Militis assimulat formam, procul ardet in armis
Aureus, aurata volitant in casside plume,
Aurea cetra humeris, lateri micat aureus ensis:
Mox prior Henricum aggreditur, dictisque furorẽ
Vipereum inspirat. Iam cursum luna peregit,
Cum ferimur pelago, & fugientem querimus orbẽ:
Atque utinam nobis lux illa extrema fuisset
Visa mari, quæ prima fuit; quando omnia retro
Inpeius*

In peius ruere, & patriam spes cassa videndi.
 O miseri mala nostra omnes vicere timores:
 Nam quid ego ventos, tempestatemque procacem,
 Quæ Cererem tumidis omnem pene obruit undis,
 Et penitus puri corrumpit munera Bacchi:
 Quid memorem rapido conuulsam turbine classem?
 Aspice, adhuc tanta superant monumenta ruina:
 Nec satis: En etiam, ceu nos incommoda rerum
 Nulla premant, miseræ urget penuria naues;
 Externa fracta quæ tempestate fatiscunt.
 Nusquã certa domus: terris prohibemur, & undis.
 Vera loquar, nostri cœlestia numina mentem
 Indignata Ducis, rabies quò ducit habendi
 Fingentem vanos quos auro exhauriat orbes;
 Crediderim has nobis e cœlo immittere pestes.
 Per solem hunc, qui cuncta videt, per sydera iuro,
 Tempore, quo prima sparguntur cœrula luce,
 Sæpe mihi in somnis materna apparet imago
 Scissa genas, canosque manu laniata capillos,
 Nate age, carpe fugam, teque hinc, ait, eripe præceps
 Rumpe moras, age, carpe fugam; nam funera classem
 Diræ manent, rabiesque omnes absumet edendi.
 Sic effata, sinum lacrymis, mare questibus implet.
 Scilicet hæc olim dederat promissa Columbus?
 Scilicet has vrbes? hæc aurea regna canebat,
 Et speramus adhuc, & inania vota fouemus?

Cui

Cui Ligurum non nota fides, secundaque fraudis
 Pectora? sed longo fac nos superesse labori,
 Et tandem optatos Indorum attingere portus,
 Indomitasque ultrò sese submittere gentes:
 Ipse suo reget arbitrio Ligur omnia solus,
 Solus erit victor, Italisque imbellibus urbes
 Diuidet & nostro quasitas sanguine pradas;
 Illi aurum montes, subiectaque flumina mittent.
 Nos humiles animæ, quas gloria nulla sequetur,
 Horrendos rerum in casus, mortemque volentes
 Fruimus: nostri fructum feret ille laboris,
 Fortunaque ferox dulci, quocunque libido
 Suaserit ire, vagas animo laxabit habenas:
 Quin potius dum strata iacent nec dum aquora tristes
 Versat hyems, dulces patriæ remeamus ad oras,
 Et Ligurem externis tumidum præcordia regnis,
 Et socios, quibus ille animum spe pascit inani,
 Deserimus, primos ubi sol induxerit ortus:
 Quare age totam armis, totam instrue remige nauim,
 Quæ cura commissa tuæ, postquam alta silebunt
 Aequora, noxque diem pallentibus obruet umbris.
 Erret aquis, quæratque sibi noua regna Columbus,
 Si quæ regna tamen soli sunt nota Columbo:
 Nos tandem antiqua repetamus littora terræ.
 Dixerat, ille odijs furisq; recentibus æger
 Dicta sequi velit, atque abitus spem pectore toto,

Tota

Tota mente secat, patria quacunque reliquit
 Cara abiens, animo, quamuis oblita, recursant,
 Otiaque, & vitæ studia intermissa quæta
 Sed tamen hæret adhuc, curisque ardentibus anceps
 Exeditur, comites reditum ne forte parantem
 Impediant, magnisque negent absistere cæptis
 Permetuit, iam dudum animos expertus Iberos
 Qui letum excipiant alacres famamque profuso
 Sanguine emant. Ergo his Perilū, cui credere sensus
 Apuero arcanos, curasque assueuerat omnes,
 Unanimem alloquitur dictis. Quo nā usq; trahemur
 Spe dubij procul a patria? nunquamne labori
 Finis erit? nunquamne lares celebrare paternos
 Osculaque in natos, expectantesque licebit
 Diuidere uxores? sed per maria inuia semper
 Spes Liguris vanas, & inania cæpta sequemur,
 Dum classẽ quassatam undis absorbeat æquor?
 Atque utinam (votis cum nil super ira relinquat
 Iusta Dei) terris nos euehat æstus Iberis
 Extinctos, patria saltem ut condamur arena,
 Funeraque Europa notescant nostra per vrbes.
 Si mihi non stabili iam dudum mente sederet
 Immotum, quemuis potius durare laborem,
 Omnibus intrepidum caput obiectare periclis,
 Quam dare vela retro, patriæque in tecta reuerti,
 Me certa eriperem morti, quin hoc mihi nuper
Ma-

*Magnanimus suadebat Ians. Hic plura volentem
Dicere, non patitur Perilus. Si certa per undas
Regna, latus mundi qua torridus obsidet aestus,
Aeternaeque urgent nebulae & durata solo nix,
Classe Ligur peteret, tibi caepa animosa sequendi
Iure animo perstaret amor, sed ludicra postquam
Dicta vides, & adhuc tot per loca inhospita vanos
Querimus Antipodas, rerumque increscit egestas:
Quid prohibet terra fines remeare relictæ,
Præsentemque exire necem? Qui sponte periculis
Inuoluit se se, & letho temerarius offert:
Ille quidem, ut meritis, crudeli funere vitam
Perdat inops fama: veterum nos sanguis Iberum
Laudatam turpi claudemus sine iuventam?
Et medijs procul ignoti condemur in undis?
Ipse Ligur potius tantorum causa malorum
Occidat, & scelerum pœnas expendat acerbæ:
Nos patriam repetamus, & æquora nota fecimus.
Ille suos eat Antipodas, quos axe latentes
Opposito, solis non proximus excoquit ignis,
At gremio tellus inamabilis ubere pascit,
Et nulli Ligurem præter nouere Columbum.
Tu nauim sub nocte para, mihi cura labantes
Interea dictis sociorum impellere mentes
In reditum ad patrias, & amore incendere terræ:
Parce metu, atque animum cunctantibus exue curis.*

Vertere iter nostra spes est super una saluti.

*Talibus unanimi dictis accensus amici
Henricus, cum nox tenebras optata reduxit,
Naum aptat, patriamque mari parat ire remenso.
Tantus agit misero mentem furor, omnis auita
Cessit laudis amor, famaue extincta cupido.*

*Iamque potens voti secum grauiora volutat
Monstrum informe erebi, stygiaque ab sede Pauore
Excitat, ut classem cecis terroribus omnem
Impleat, inceptisque metu desistere cogat.*

*Protinus ille humeris alas pallentibus aptat,
Seque tremens agit ad naues, cui frigidus Horror
Est comes, & lento repens Ignauia gressu.
Hic varias sese in facies ignobile monstrum
Induit, insinuatque animis, atrumque timorem
Immittit, torpent inuita ad iussa phalanges,
Et magni piget incepti, tædetque laborum;
Omnibus ante oculos lethi præsentis imago
Terribilis, iam iam de cælo afflariet igne
Quisque sibi, pelagone tegi surgente videtur;
Horror inest animis, trepidos Pavor alligat artus.*

*At Perilus varios confusa in plebe tumultus
Excitat, atque auidas terra dulcedine mentes
Commouet: huic natos, fessamque ætate reducit
Matrem animo, & primos deserta uxoris amores,
Huic veteres, frustra quos iam suspiret, amicos*

Nire-

Ni reditū voret in patriam, Liguremque relinquat
 Incertum quo tendat, adhuc tamen ire volentem.
 Fit strepitus, rumorque alitur consensibus ingens.
 Omnibus unus amor Hispana ad littora cursum
 Flectere, desertoque domum remeare Columbo,
 Detegat externas Titan ni crastinus oras;
 Quin socios, ipsumque Ducem, si forte repugnet,
 Inuadant armis. Et iam delapsa polo nox
 Merferat humanas letheo flumine curas;
 Solus adhuc, nec somnum oculis, nec corde Columbus
 Accipit, at partes animum deducit in omnes.
 Senferat ille famem tota crudefcere classe,
 Et vulgi variare animos, certumque minari
 Exitium, spes nulla super, diuisa receffit
 Terra procul, passimque lues increfcit eundo
 Continuo supplex oculos ad sydera tollit,
 Taliaque illacrimans duplicato poplite fatur.

Summe Pater, si non pradandi insana libido,
 Non amor imperij, patrijs me excedere tectis
 Suasit, & infido vitam committere vento;
 Sed tua diuersæ colerent vt Numina gentes,
 Pelle famem, vulgique nouos compefce tumultus.
 Si tamen has pœnas mea facta indigna reposcunt,
 Ab nimium malefacta, grauique obnoxia pœna,
 Me me adige in tenebras, intorto fulmine solum
 Deijce me, meritumque flagrantibus obrue flammis:

*Quid socij meruere mei? quos fidere ponto
 Egit amor: cultusque tuus: da littora saltem
 Tangere, & optato tandem succedere portu.
 Non mortem horremus, vitam effudisse iuuabit
 Tela per, & flammæ: pariant modo funera laudem
 Nostra tibi, discantque nouæ tua nomina gentes.*

*Audijt orantem supera de gente minister
 Alipotens, ut cælo aderat delapsus ab alto:
 Olli cura pÿ quondam commissæ Columbi
 Cum primum tenero tetigit pede limina vitæ.*

*Nam cuiusque suus cælestum ex agmine custos
 Mittitur aerias nascenti in luminis auras:
 Ille regit sensus, sopitaque semina recti,
 Quæ nobis primo natura in seuit in ortu,
 Excitat, ille suæ, nutrix ceu seditula, curæ
 Assistit custos animo, stimulisque iacentem,
 Ah miserum terræ si mortifer applicat error,
 Increpat ut se tollat, iterque affectet olympo,
 Cuius & inscripto curas, & facta libello,
 Et pia dicta notat, longumque adseruat in æuum,
 Ut Christo quondam exhibeat cùm crimina iudex,
 Et vitas hominum supremo in tempore queret.*

*Nec mora, remigio volueris ferit æra penna,
 Ardentesque Ducis gemitus, generosaque secum
 Vota tulit: quæ postquam alti gens ætheris hausit,
 Mota prece est, iustasque viri miserata querelas.*
 Extem-

*Extemplo densi, dextra, lauaque coronant
Regis Tergemini solium, vocesque precantis
Ostentant, tacitoque omnes eadem ore reposcunt*

*Ipse sedet, nebulaque alte subnititur aurea,
Syderibus quæ picta sinum procul omnia magna
Luce replet, variatque vagos incerta colores:
Non aliter, niueæ vestit quæ colla columba
Nunquam eadem, similisque sibi sub sole videtur
Pluma levis: nunc purpureo fulgere pyropo,
Nunc virides auro credas circundare gemmas,
Spectantumque oculos dubia sub imagine ludit.*

*Sub pedibus Natura parens, primæque rerum
Materies, & motus, & irremeabile tempus,
Atque anni quadriceps in se redeuntis imago,
Ællum leuato speculi candentior orbe
Vestis obit, quæ sunt, quæ mox ventura sequuntur
Quæque fuere prius, superis spectantibus offert
Inconsuta chlamys: canentia tempora cingunt
Bissen circum radij: non spicula lucis
Cælicolæ sufferre valent, non ora tueri
Comminus, oppositisque obnubunt lumina pennis*

*Ut Pater omnipotens tanto in discrimine cernit
Esse suos, monstrumque Erebi succendere classem
In furias, gentemque odijs versare quietam,
Communemque legit cælestum in fronte dolorem:
Annuat, & puerum iubet ocyus æthere labi*

Unum

Unum ex alitibus, fessasque accedere naues
 Ut tandem ponti longis erroribus acta
 Speratos turgent portus, non cœpta retardet
 Aut metus, aut male suada fames, nō fœta dolis gens
 Missa erebo; liquidi subsidant marmoris ira,
 Et lux optatas ostendat crastina terras:
 Sic fixum est, summique Patris hæc certa voluntas.

Ille volat, nitido perfusum lumine calum
 Risit, & obstantes penitus cessere tenebra,
 Pictaque non solita tremuerunt æquora luce.

Forte Duci serus labentia lumina somnus
 Presserat, & curas inter subrepserat agras;
 Cui se per noctem stellata in veste videndum
 Obtulit, & placido sic Nuncius ore loquutus.

Tu nunc ignave potes indulgere quieti?
 Onimium secure tui, secure tuorum:
 Iam fugiet veniente die comitesque relinquet
 Immeritum qui te stimulis furialibus odit,
 Perfidus Henricus, iam per maria alta rebellem
 Aspicias caræ repetentem mœnia terra.
 Eia age, conciliumque voca, sociisque furorem
 Excute, conceptosque metus; nam lumine primo
 (Sic placitum Superis) incognita littora tanges,
 Et Christum, ut sacri promittit nominis omen,
 Christo fore in nova regna feres, iam se æquoris unda
 Sternit

Sternit, & equati spirant in carbasâ venti:
 Ipse adero, ne gens immâni emersa baratro,
 Implicet insidijs improuida pectora vulgi,
 Inficiatve odijs, terrave cupidine vexet.
 Nec fari me vana putes, tibi Nuncius adsum,
 Aeterni Patris imperio, demissus ab astris.

Hæc ait. Ille toro surgens; en omina letus
 Tanta sequor; modo Sancte faue, promissaque serua,
 Quicquid erit, laus vestra omnis, tū plurima magnâ
 Matrem humilis, superosq; orat, summiq; Parentis
 Imperio parere parat: mox imperat omnes
 Acciri socios, positus exercitus armis
 Ad loca iussa fluit, lucem funalia flammis
 Dant circum, trepidantque rotantia vertice sumû.

Venit & Henricus, nam postquam Nuncius ales
 Christophorum admonuit, mandatq; prima peregit,
 Illum adit; effugiunt mutato e pectore pestes
 Tartareæ, menti que prior lux redditur ægræ:
 Non tamen irarum caussæ, veteresque dolores
 Funditus effluxere animo, sic æquoris alti
 Postquam discordes commorunt cœrula venti,
 Si ponant, stridorque omnis, fluctusque residat,
 Se tamen unda agitat, scopulisque inflicta reclamat.
 Ipse dehinc solio Dux talia cœpit ab alto

Magnanimi comites (neq; enim nescitis, & omnes
 Exhaustas pelagi furias, tot naufraga saxa

Tot sco-

Tot scopulos, cœlique minas: superata ferendo
 Omnia: qui nouus hic mentes, ac pectora terror
 Tantus habet? quò vis animi vetus illa receßit?
 Nil desperandum Christo Duce. si maris undas
 Hactenus, & cœli rabiem vicistis iniqui,
 Inceptis & adhuc immoti haretis in ijsdem:
 Nunc, postquam casus rerum superauimus omnes,
 Nec requies procul est tantorum optata laborum,
 Ibimus in patriam indecores? non pectora tanget
 Gloria? non superum cultus? quem credere dignū est
 Expectare nouum nobis aëtoribus orbem.
 Nec tamen, aut vrbes pelago repetamus Iberas,
 Aut noua seëtemur felicitis littora mundi,
 Sæua fames, tumidique ideo maris ira quiescet:
 Sunt eadem, ò socij, subeunda pericula nobis:
 At non euentus idem est, fructusque malorum.
 Nam si ventosis animam ponamus in undis,
 Dum noua tentamus Christi pro nomine regna,
 Felices obitus: quis enim neget auspice tanto
 Ire necem in certam, & meliora capeßere regna?
 At si dum cursus iteratis classe relictos,
 In patriam reditus tempestas sæua negarit,
 Quid mala tot pelago toties exhausta iuuabunt?
 Quid tantum superasse maris? quid denique viles
 Proiecisse animas? ah ne vos sæda cupido
 Occupet, & falsa pietatis imagine ludat.

Longa

*Lōga quidē Hispanas procul hinc via diuidit vrbes
 Quis scit an externum lux proxima detegat orbem?
 Tempora quid ventura vehant, euentaue rerum
 Cæca nocte premit prudens Deus, alta nec ullus
 Mente queat summi decreta attingere cæli.*

*Quin mihi nocte sub hac liquido puer æthere lapsus
 Visus adeste palam, & certas promittere terras,
 Aurea cum primo cæli plaga sole rubescet:
 Somnia nec vanos deludunt ludicra sensus.*

*Ergo agite inuicti comites, grauioraque passi,
 Vt vos mirentur, nequeant equare minores,
 Interea vanis animum defendite curis
 Ne patriæ perstringat amor: permittite Diuis
 Cætera, nauifragas cautes, vada cæca monebit
 Christus, & ipse uiam turbata per æquora pandet,
 Ipse epulas cælo, nos si fera cogat egestas,
 Demittet, rebusque volens succurret iniquis.*

*An non sic olim Isacidas deserta vagantes
 Tesqua per, & syluas cælesti nectare pavit?
 Ostenditque viam, silicisque è vulnere fontem
 Largisuum elicit? an non via facta per undas
 Oceani, gressus qua legifer intulit heros,
 Dum populum extorrem promissa in regna reducit?*

*Vix ea dictas fremor procerum turbata per ora
 Fractus ijt, qualem percussa Aquilonibus edit
 Sylua loquente coma, qualem stridentia reddunt*

C

Agmi-

Agmina apum, densa cum circum aluearia mussant.
 Tunc annis, meritisque grauis Tudēsis Hoiedas,
 Gloria, quem uarijs quasita laboribus ingens,
 Consilijs quod bella suis, dextraque iuuasset
 Boetica, sublimem comites super extulit omnes;
 Surgit, & hac placido ore refert. Non aquora cursis
 Ut rudis imbueret pelagi, fortissime Ductor,
 Deseruit patrios pubes Hispana penates,
 Seque volens Duce te sub tanta pericula misit;
 Non amoris sterilis fama, sed ut ultima ponti
 Claustra super, noua regna polo depressa sub imo,
 Detegeret, patrum senior quæ nescijt etas,
 Atque alium Christi sacra sub iuga mitteret orbem;
 Hic labor extremus, longarum hac meta viarum
 Ultima erit, nec te, certam licet omnia mortem
 Intentent, victus licet improba gliscat egestas,
 Deseret, optime Dux, tecum aut moriemur, & ingēs
 Hoc erit extinctis immiti morte leuamen,
 Magna ausos cecidisse, nec expauisse repostas;
 Axe sub aduerso, noua per freta, quarere gentes
 Aut tecum extremos hominum penetrabimus Indos,
 Regnaque venturis reſerabimus inuia ſaclis;
 Scilicet exhausta post tanta incommoda claſſis
 Et venti rabiem, & ſatiatas aquoris iras,
 Propositum rumpamus iter, patriamque petamus,
 Ut quæ (ſi veri quicquam mens prouida cernit)
Pramia

Premia iam nostris immensa laboribus instant,
 Audaces Galli, Lusitani ve sequuti
 Cæptum iter, arripiant, fama que opibusq; fruantur,
 Nos patriam interea, & sedes foueamus auitas:
 Quid gentes Itale? quid tota Hispania dicat?
 Si classem hanc, magni vix primo in limine cæpti,
 Non pelago, non Marte, metu sed mortis inani
 Deuictam, patrias repetentem viderit oras:
 Non nos facta patrum, non nos victoria tales
 Boetica promisit, variisque exercita virtus
 Nostra malis, rebusque audacia maior in arctis.
 At si quem vulgi è numero vesana cupido
 Incendit reditus, curisque infamibus angit
 Ille eat, & caros petat illaudatus Iberos,
 Nos te, maxime Dux, aderit dum vita, sequemur.

Talia dicenti comitum manus omnis, & omnes
 Assensere duces; intus cælestis agit vis
 Pectora enim, solidique animos spe firmat honoris.

Ipse quoque Henricus, cui non tolerabile visum
 Aequor, & antiquas patriæ rediturus ad oras,
 (Proh pudor) insidias, abitumque in nocte pararat,
 Nunc tantum si quæ factis extinguere famam
 Dedecorum queat, & lethum pro laude pacisci,
 Secum mente agit. Tibi quæ corda iuuia Sancte
 Spiritus, æthereos afflas qui sensibus ignes?

Et iam se cælo tenuis diffuderat aura

*Nuncia ventura lucis, caput illa coronat
 Interea, violisque sinum immortalibus implet.
 Cum procul innumeras anates, turbamque sonantē
 Mergorum, denso per sudum examine ferri
 Prospiciunt, tremulumque externi luminis ignem
 Aut uidet, aut vidisse putat Lelepeus Arisba
 Obscuras inter nebulas, lucemque malignam;
 Ostentatque hilaris, vocemque ad sydera iactat.
 Eia agite ò comites, & qua data signa sequamur:
 Ipse manu nobis vibrantem ex æthere flammam
 Ecce quatit Deus, & felicia littora signat.*

*Dixerat: interea consumpta nocte ruebat
 Aurea lux, cælumque nouo candore rigabat.
 Non alias cinctum maiori lumine duxit
 Illa diem: fugere truces toto aëre venti,
 Ardentesque micant aura, tonitruque secundo
 Dat signum Pater omnipotens: cum surgere tellus
 Visa procul, sensimque humiles se attollere montes.*

*Ilicet excelsa Rodericus ab arbore primus
 Clamorem ingentem tollit, terramque salutat:
 Terram omnes, terram ingeminant, tormentaq; cæli
 Aemula, dum flammā, & ventosa tonitrua miscet,
 Expediunt: una sonitum percussa remittunt
 Aequora, & insolito tremefacti murmure montes.*

*Quæ Dux magne tuum tentabant gaudia pectus?
 Quid tibi tunc animi? cum iam vicina videres*

Littora

Littora, tantorum studio quasita laborum?
 Nempe humilis tacito tecum sub corde voluntas
 Felices rerum euentus, acceptaque gratus
 Cuncta Deo, superisque refers: non ceca cupido
 Imperij, fastu tumefactum tollit inani,
 Non auri rabies, & amor sceleratus habendi.

Jamque propinquabant terra, iam carbasa nauta
 Demittunt malo, puppesque ad littora vertunt.

Cum sic Ductor ait. Salve ò pulcherrima rerum
 Terra ferax, uni mihi tot seruata per annos,
 Quam propter certa potui me exponere morti:
 Ne, precor, externos ne dedignare colonos.

Nam neque nos vento, pelagique erroribus acti
 Afferimur, seculo sed inobservata priori
 Per loca rexit iter, nosque huc Deus adpulit auctor:

Cede Deo, simul hæc, simul ingens undique clamor

Nauticus: assensu responsant æquora rauco.

Et iam deducta sic cum insedere carina.

Continuo littus superis ingressus amicis
 Oscula dat terræ, & supplex procumbit humi Dux
 In genua, & lacrymans hæc imo è pectore fundit.

Quas tibi? quas tanto referam pro munere grates

Summe Pater? Tu me penitus nil tale merentem,

Qui nomen, ritusque tuos trans cognita ferrem

Sydera legisti, tantumque audere dedisti:

Tu mulces venti rabiem, tu sæua coërces

Mon-

*Mōstra Erebi, classēque tumentibus æquoris undis
Ereptam toties felici in littore sistis :*

*Ah ne forte tuam mea nunc facta impia mentem
Auertant, sed dexter ades, sed dirige fessos
Ignarosque viæ, rerumque exordia firma.*

*Dixerat, & mortis monumentum insigne subacta,
Quadrifidum, ingentem, transuerso stipite truncum
Sublimi in tumulto tolli iubet, ocys omnes
Incumbunt operi, cuneisque immania findunt
Robora, nec requies, donec venerabile signum
Attollunt cælo, & spumanti in littore figunt.*

*Corpora dehinc longo curant exhausta labore,
Coneussisque famem arboribus solantur, & herba,
Pocula sunt vitrei fontes, nam cætera rerum
Munera, quæ pressis secum aduexere carinis
Pontus habet: sed forte nemus dum cuncta per altū
Luminibus lustrant, prædæ quo ducit egentes
Importuna fames, procul in conualle reducta
Populeas inter frondes sub monte lacunam
Aspiciunt, stagnoque anates innare tacenti;
Ollis picta rubet cervix, argentea canent
Pectora, nec certa variantur tergora pluma.*

*Constitit hic Hispana phalanx, turbamq; volātem
Ut vidit, quæ nunquam humero deponere lauo
Tela solet, plumbi procul effundentia glandes
Aere cauo, inclusum si sulphur adederit ignis*

Plena

Plena nitri gremium sectique in frusta metalli,
 Corripuere manu, nemus, & iuga visa moueri,
 Intremuitque palus, & iam resupina per undas
 Corpora voluuntur miserarum infixam natantum.
 Accingunt præda iuuenes, viridique sub umbra
 Instaurant epulas, dapibusque explentur opimis.

Interea Ductor cum iam deserta per alta
 Omnia lustrasset late loca, littora postquam
 Desolata videt, populisque vacantiæ regna,
 Ulterius pelago gentes penetrare repostas
 Constituit, notisque iterum se offerre periclis:
 Tantus amor cultus vanorum abolere Deorum,
 Hæc illum cura una dies, noctesque fatigat.

Protinus irato quassatas æquore naues
 Componunt, solidisque trabum compagibus armant,
 Materiam sylua alta dabat, pars fontibus urnas,
 Pars naues urnis pomisque agrestibus implent,
 Pars clauos, cuneosque nouant, labefactaque firmant
 Vincula, mox sicco multa vi e litore classem
 Detrudunt, natat uncta ratis: iamq; Auster in altis
 Vela vocat, placidique inuitant marmora ponti,
 Carbasa dant cælo nauta, & vada liquida verrunt.

Ipse sedens celsa in puppi refluentia Ductor
 Cœrula, nec stabili spirantes flamine ventos
 Obseruat, terræ signa indubitata propinqua.
 Nox ruit & cælo stellas educit aperto,

Ille

*Ille nigrantis currum denso agmine matris
 Intortum per iter, varia sub lege, sequuntur :
 Protinus externi secum miratur Olympi
 Hac ignota tenus lucentia signa Columbus,
 Et cupidos picto suspendit ab aethere visus.*

*Illic astra polo, nostris maiora, sereno
 Scintillare videt, fulvaeque effulgere luce
 Aurata Crucis in speciem: mox cætera, nunquam
 Visa prius, tacito suspectat sydera vultu,
 Insuetæque animum novitatis imagine pascit,
 Dum socios ignes puro aureus ore coegit
 Lucifer, & noctem oppositas exegit ad oras.*

*Linquntur à læva sublimi abscondita ponto
 Insula, victrici quæ iam subiecta Quiqueia;
 At nunc Cannibali priscis erepta colonis
 Littora dira tenent, insensique omnia circum
 Oppida diripiunt, populisque imbellibus instant:
 Infandum genus: haud morem nec publica belli
 Iura colunt, atro captorum sanguine sædam,
 Sanguineq, ingluuiem membrisq, tremētibus explēt:
 Tum quos sera atas peioribus ingrauat annis,
 Selectos in frustra secant, extremaque multo
 Membra sale aspergunt, tectisque affixa reponunt:
 Ossibus albentes agros, & squallida tabo
 Viscera parietibus videas pendere cruentis.*

*Hic superum è numero iuuenis cui credita classis
 Cura pia*

*Curapia (neque enim tantum est suus additus uni-
cuique hominum è cælo custos, sed regna, sed urbes
Quas gremio mare nauigerum, quas maxima tellus
Undique habet, diuùm custodia certa tuetur)*

*Ergò suspectis ne fortè aduertat arenis,
Et sese imprudens in aperta pericula mittat,
Impulit ipse manu classem, volat illa per undas
Stridula, Cannibalumque altis cita præterit arces,
Matytinaque sinum celeri fugit incita cursu:
Culta feris loca virginibus, procul inde virorum
Interclusi aditus generi, ni tempore certo,
Alma Venus cum vere nouo sarcire caducæ
Damna monet gentis, facibusq; inflamat amoris,
Cannibalos in tecta vocent, communia regni
Ipse sceptra tenent, pacemque, ac bella ministrant,
Et pulcra populos in libertate tuentur.*

*Non alia, nox una mares cum sustulit omnes,
Victrix turba feram possedit sæmina Lemnon.
Tandem humilis proras accedere Cuba videtur
Et sese è tumido paulatim attollere fluctu,
Donec delati in portus, terraque potiti.*

*Interea nemorum è latebris confluxerat ingens
Turba virum, piceis cui pendet ab auribus aurum,
Nigrantesque artus nullo velantur amictu,
Vidit ut armatas turrata in classe cohortes,
Veluolisq; leues instratas curribus undas*

D

Obstu-

Obstupuitque, retroque pedem exanimata reflexit :
 Tunc equitum è numero iussi erupere, frementesque
 Exhortantur equos, & lora undantia laxant,
 Jamque humeris instant fugientis, at acrior illa
 Carpere prata fuga, & rapido petere auia cursu,
 Donec abit procul, arboribusque oblecta recessit
 Ex oculis, nec iam possunt equare sequendo
 Cornipedes, nemus obstat, & altior implicat herba.

Ergò equites (quanquã ora pudor notat, ira, mētē
 Sollicitat) relegunt iter, ignotosque per agros
 Vndisonum ad littus versis referuntur habenis.

Talis ubi leporem iuga permontana sequutus
 Ereptum ex oculis nusquam uidet, ager, anhelans
 Ad dominum redit umber, & acri fluctuat ira:
 Iamque velit præda, laudumque incensus amore
 Ocyor ire iterum, campo si fortè patenti
 Discurrant excita suis animalia lustris,
 Intentisque oculis, arrectisque auribus astat,
 Anteeunt catuli, atque auras sectantur odoras.

Postquam nulla datur Cubam explorare potestas,
 Nec loca, nec gentis mores, laxata ferenti
 Pandunt vela Euro, volat incita flamine classis,
 Nec mora, vicinis Quiqueia allabitur oris,
 Finitimas inter longè quæ maxima terras
 Insula, diues opum, & saxosis aspera campis
 Unde loco prisca nomen fecere coloni

Haytumq;

Haytumque vocant, spumanti gurgite pontus
 Tundit utrinque latus, mediamque ingentia findūt
 Flumina, quorum auro flauentes torquet arenas
 Cotyus, ex altoque volutus monte Cibauius.

Hos olim, ut perhibent, diuersa ab sede profecti,
 Cum iam Matytina arderet ciuilibus armis,
 Eiecti patria, pœnisque ingentibus acti
 Deuenere locos populi, quo ventus, & vnda
 Impulit, hic latam mirati littoris oram,
 Camposque, syluasque, & amictos gramine colles,
 Piscososque lacus, Cemys in prima vocatis
 Omina, quâ longo se se explicat area tractu,
 Frondentes posuere domos, & nomine, magnam.
 Consilijs, opibusque urbem dixere Cypangam
 Nunc terra hos prima tractus, & littora latè
 Rex Narilus tenet imperio, populosque beatos
 Aeterna sub pace regit, ni sæpe feroces
 Cannibali inuitum funesta in pralia cogant.

Ut primum optatis Ductor consedit arenis,
 Viginti lectos equitum (nanque omnia circum
 Culta videt) Regem & mores, & mœnia gentis
 Explorare iubet responsaque certa referre,
 Dehinc equitum legio, peditumque exercitus omnis,
 Cum primum humentes tenebras aurora fugarit
 Crastina, sub ducibus campo se ostendet aperto,
 Imperat, interea tristes secludere curas

Defessosque animos placida laxare quiete.

*At ne quis populare agros, neu vertere pradas
Audeat ad littus, spatijque excedere iussis:*

Ni faciant, pœnas, lethumque infame minatur.

Et iam purpureis Titan emerferat undis

Aureus, & campos fecunda luce serebat:

Nec mora fit, peditum plenis è nauibus undam,

Castra vomunt, reboant colles, pulsusque procella

Ferripedum, magno tremit omnis murmure campus

Pulvereus, nigramque eiectat ad athera nubem.

Sex turma, totidemque Duces, hos tota sequuntur.

Agmina, tercentum, Hispana robora pubis,

Cuique merent numero pedites, quorum una, cauato

Liuentis plumbi glandes intorquet ab ære,

Seruatumque ignem fumanti in fomite gestat,

Altera pars humeros ingentibus ingrauat hastis;

Omnibus in morem crines premit ærea cassis,

Omnibus it collo candentis circulus æris

Sutiles, & gladius leuum latus armat Iberus.

Iamque in conspectu varijs legio omnis in armis

Regis adest, dant signa tubæ, quassataque fracto

Timpana, tæta tonant strepitu, sedet altus, & omnes

Dux legit, instructasque acies, animosque paratos

Et tam certa ducum mirari pectora gaudet.

Tu modo, quæ veterum monumenta insignia reris

Adseruas, nigrique è faucibus eripis orci,

Liuida

*Liuida ne nomen sacclorum obliteret atas,
 Tu mihi fama globos equitum, peditumq; maniplos
 Suggere, quique Duces externa in bella sequuti
 Magnanimos ausus, cunctamque ex ordine gentem:
 Non ego res tenebris possim, terraque latentes
 Eruere, & cœli nitidas efferre sub auras,
 Tu mecum ingentis ni facti euolueris oras.*

*Primus adest Buylus, talos cui vestis ad imos
 Undique nigra fluit, quo non magis utilis alter
 Veracis Fidei ad cultum, & pietatis amorem
 Ore ciere viros, moresque inhibere nocentes,
 Et mulcere animos, & pectora flectere dictis;
 Nec semel astra super cœlique volubilis orbes
 Mente fugit, fruiturque Deo, secretaque summi
 Aeteris in terras desert, hoc scilicet illum
 Omnipotens Genitor magno dignatur honore,
 Contemptis pro diuitijs, fastuque parentum,
 Nam leges Benedicte tuas, & facta sequutus
 Crescentem instituit tua per vestigia vitam,
 Deseruitque domum, atque adytis sese abdidit ultro,*

*Ille manu ostentans patientem mortis iniquæ
 Fixaque transfuerso distentum brachia ligno
 Bisgenitum Regem, pedibus per scrupula nudis
 Fuit primam ante aciem, plenoque hæc ingerit ore.
 Hoc Duce vincendum, o comites, huic fidite Signo.*

DEEST CATALOGVS.

CO-

COLVMBEIDOS

Liber secundus.



*T iam fama nouis totam terroribus
Vrbem
Concutit, atque animos stimulis ingenti-
bus urget :*

*Illa volans, grauidas ignoto milite naues,
Aerat asque virum turmas pratexere littus
Detulit, & curuo Cypangæ insidere portu;
Iamque armis in Regna ruentiam templa domosq;
Diripient, ipsumque petent in vincula Regem;
Talia per trepidas rerum miracula gentes
Monstrum infame canit, succensaue pectora bello
In ferrum vocat, attonita discurritur Vrbe
Pars sudibus, pars lethiferis armata sagittis,
Saxa gerunt pars magna, venenatasque macanas,
Omnibus ora niger tingit color, omnibus harent
Indigetum fronti simulacra impressa Cemorum.*

*Non secus aucta mora, & crassa fuligine pinguis
Fumida flamma, domos, tacita sub nocte, potentum
Si voret, inque trabes, quas iam gustauit, habenis
Effusis furat, exitium restinguere ciues
E tota temere Vrbe ruant, pars flumina plenis
Subue-*

*Subuectare urnis; pars alta euellere tecta
 Caiissam igni: varijs clamoribus intonat ether,
 Et violata nigro pallent astra aurea fumo.*

*Primus adest, iaculisque manum letalibus armat
 Regia progenies Tarilus, quem deinde sequuti
 Ersilus & Sagaris, partu quos edidit uno
 Mixta parens Cemio, formaque insigne paterna
 Ostentant summa surgentia cornua fronte,
 Nudi ambo, latis intecti frondibus ambo.*

*Ecce manu praeceps animi Corineus obustum
 Torrem quassat agens, sociosque incendia poscit
 Vociferans, furijsque fremens; quid statis inertes?
 Tutus an ut captis incendat rura colonis,
 Interea, pradasque ad littora congerat hostis,
 An potius securam armis aduentet ad Urbem,
 Nosque domos inter, Diuumque altaria querat?
 Ferte faces, rapite arma, ratesque inuadite flammis,
 Author ego. Vix hac. Iam tela facesque iuuentus
 Sana fremit, sudibusque manum flagrantibus implet,
 Scintillant ignes, it crassus ad aethera fumus;
 Et iam dispositi in turmas inimica petebant
 Littora, cum tectis Narilus decurrit ab altis
 (Incerta neque enim fama levis aura, sed Antes
 Nuncius ecce volat, caecosque instare tumultus
 Edocet, inque minas, atque arma ardescere vulgus)
 Tela inhibere iubens, magnaue ita voce profatur.
 Quo*

Quo ruitis? cohibete animos, sauumque furorem
 Mittite: non armis hominum, non viribus ullis
 Tempus eget: classem hanc alieni a finibus orbis
 Venturam cecinere Cemi: quis numina Diuum
 Bella ferat contra? non si tota ingruat armis
 India, venturae poterunt obstare ruinae.
 Si quā viam fortuna dabit, si quā aspera vertent
 Fata preces; tunc insidijs, tunc viribus usus:
 Hanc seruate precor meliora in tempera mentem.
 Nunc potius naues ultro excipiamus amicas,
 Iungamusque fidem: quod si decedere regnis
 Forte velint nostris, victuque, opibusque iuuenus.

Sic ait, at curis animum mordetur amaris
 Et secum sub corde Cemi responsa reuoluit.
 Nam cū sceptrā patris quōdā post funera Beuchi
 Acciperet Narilus, terrisque instructus, & alto
 Cannibalos erepta reposcere regna pararet,
 Iuit ad Oboinam scitatum oracula rupem,
 Quid tandem super imperio ventura minetur
 Hora, quid ira Cenum magna promittat Hayto.

Est prope Samana fines sub monte recuruo
 Antrum ingens, unde, & solem, teque aurea Phæbe
 Emersisse ferunt: ornīs frondentibus undat
 Desuper, horrentique locum nemus obruit umbra.
 Huc, & Samana gentes, Cibauaque tellus
 Conueniunt, trepidisque petunt oracula rebus:

E

In me-

*In medio Cemius antrum tenet, aptaque ligno
 Inclusus responsa canit, venturaque falsis
 Inuoluit, dubijsque animos ambagibus implet.
 Quò postquam attonito solus cum Rege Sacerdos
 Venit, & intactis ridentem floribus aram
 Permulsit, fusosque solum spirauit odores
 Tres perhibent illos Cereris sine munere luces,
 Et totidem insomnes traxisse ex ordine noctes,
 Orantes veniam, & precibus responsa petentes:
 Limina contremuere, recussa que mugijt ara
 Horrendum, rupeque audita que sylua moueri
 Nam Cemium Pater omnipotens ignota parantem
 Reddere & ambiguis mentita oracula verbis
 Immiscere, domans premit, & qua dicta remittat
 Ipse preit, tum vox arrectas perculit aures.*

*Ne luctus, ne quere tuos ne quere tuorum
 Optime Rex, fuimus Cemij, Quiqueia quondam
 Terra fuit, iamque ecce dies infanda propinquat,
 Imperis quæ te tentantem plurima frustra,
 Arceat aut ritus dediscere cogat auitos,
 Ecce virum innumeras longa cum veste phalanges
 Externo vehit huc incognita classis ab orbe,
 Quæ tellus Cibana, & quæ Samana videbis
 Funera, si certa quisquam obuius ire ruina
 Audeat, insidiasque dolosve intexat opertos,
 Non illos obscæna fames, non æquoris ira*

Non

Non coniurati bella in communia Reges
 Proposito flectent, ut tonsa bipennibus illex
 Aerio qua monte caput sub nubila condit,
 Damna per &, cædes ferro deducet ab ipso
 Magnus opes, animumque hostis vim viribus, artē
 Artibus exhibit, nec spes super ulla salutis,
 Et grauiora manent venturos damna nepotes,
 Namq; olim summa Regū de gente PHILIPPVS
 Quē grauida imperijs domus efferet Austria Cælo,
 Nascetur, patria nulli virtute Secundus
 Non satis vnus erit totum quem maximus orbem
 Regnator premet, & paribus frænabit habenis,
 Illi sceptrum etiam tellus tua debet, & omnis
 India, prob quantas in me excidiumque Deorum
 Quos colitis pœnas quantas ferus ille ciebit
 Per populos passim strages si sacra recusent
 Et patrios mutare Cemos, maris arua rubescant
 Cædibus, & vestro nulla ora cruore carebit.
 Mittet & ille viros magnum quos nomen IESV
 Audito quo terra tremit, tremit arduus æther
 Et procul inferni turbant septem ostia regni
 Insigni ornabit titulo quibus aurea vitæ
 Fumum & opes strepitumque exosus Ignatius orbis,
 Et morum præcepta dabit, tuus inclyta ciuis
 Aeternumque Nauarra decus, hi morte superbi
 Pro superum cultu, pro Relligionis honore

Exponent cruda fidentia pectora morti.
 Tūc Reges noua sacra humiles, & vulgus, & omnis
 Accipiet Quiqueia, nouasque assuescet ad aras
 Thura dare, atque alios casta prece poscere Diuos,
 Et veteres ultro dediscent secula mores.
 Finierat, fumumque ingentem faucibus efflat:
 Jam suus, & tetrīs arserunt cornua flammis.

Hi Narilum monitus in publica bella volentem
 Ire vetant, vultumque hilarem, mentemque benignā,
 Vestit in Hispanos: seseque ad littora ferri
 Prima iubet: subeunt oneri quos incluta factis
 Dexterā, quos altum plebi genus eximit ima,
 Bissenī iuuenes, partitoque agmine Regem
 Attollunt humeris: lato sedet ille pheretro
 Sceptra tenens, magnamque premit sub pectore curā:
 Hinc, atque hinc armata cohors, cui tecta tueri
 Regia, & immensi custodia credita regni,
 Nudi omnes, vario tincti omnes membra colore,
 Agglomerant; non his gladij, non cuspidis usus,
 Stipitibus duris, sudibusque armantur acutis.

Pone subit magna matrum comitante caterua
 Anacaona soror, qua non prudentior vlla
 Imperio populos regere, & dare iura subactis,
 Seu velit iniustos grauibus compescere pœnis,
 Seu meritis equa partiri premia lance:

Fæmineos neque enim calatos dignata superba

Attre-

*Attrectare manu, atque artes addiscere mutas :
 Sed regnare palam fraterna assuevit in aula,
 Supra annos, sexumque, animos curamque virilem
 Gessit, & antiquos equasset fœmina Reges,
 Nî furor ardentis virtuti obstasset amoris :
 Quin etiam belli, quàm pacis amabilis artes
 Edidicit, cursuque feras, iaculisque sequuta
 Saxa per & montes equo in certamine vicit,
 Molliaque assiduo durauit membra labore
 Leuam arcu, grauida que humeros armata pharetras
 Nunc tamen Ausonio cum prodeat obuia Regi
 Illa caput, nulloque intectum corpus amictu
 Et roseis ornat eburnea brachia sertis,
 Membra colorati velabant cœtera flores;
 At leues humeros depexo contegit auro
 Crinis, ab effuso qui vertice plurimus errat.*

*Vt prope deuentum ad naues, caua tympana signû,
 Vocalesque dedere tubæ, cum protinus Heros
 Ausonius, Narilo è castris procul obuius exit:
 Ecce tubæ raucos iterum, percussa que cantus
 Tympana congeminât, strepitu Cœlû omne resultat:
 Hinc atque hinc sese in partes exercitus ambas
 Diuidit, & latum dat iter, qua magnus utrinque
 Se Regum comitatus agit, vexilla que campo,
 Armaque reclinant; tum celsò à littore Ductor
 Per medias se fert acies, quem tendere contra*

Vt vi-

*Ut videt, ad terram pheretro Rex Indus ab alto
Defluit, actutum cui multo occurrit honore
Dux prior, & verbis ultro compellat amicis.*

*Non ego bellandi vano succensus amore
Veni equidem, Rex magne, tua grauis esse quieti,
Et fortunatam trahere in certamen Haytum,
Hac alijs sit cura, quibus nec cura quietis
Vlla sua, nec honoris amor, me regis Iberi
Maxima cui nostri pars sponte obtemperat orbis
Quo nec pace prior, bellique laboribus alter
Iussa novas egere per hæc freta quarere terras,
Et tentare viam, quam nulla recluserat ætas,
Ignotas priscis alat hæc plaga an ultima gentes,
Aequor inexhaustum emensos, loca sæta periclis,
Nos tandem vestris fessos Deus appulit oris;
Ne pigeat regno excipere, aut permittere classi
Littoris hospitium, neue in commercia nostri
Vos ultro inuitantem, & sædera diuitis orbis
Ignorete mei mentem, ac noua munera Regis.*

*Talia mellito dicentis ab ore fluebant
Instar aquæ, fracto per leuia saxa susurro
Frigidior glacie, cryſtallo purior alba,
Quæ strepit, ardenti fessis solamen in æstu;
Densû humeris stupida aure bibit, nec sanguine nostro
Progenitum, at superæ referentem semina lucis
Ut lapsum summo miratur ab æthere vulgus.*

Tunc

Tunc Narilus contrà sic vocem in verba resoluit
Optime Dux, ego te, tantos qui pandis in usus,
Nec notos inter se orbem coniungis utrunque
Accipio, agnoscoque libens, Regisque, quod offers
Fœdus amicitiamque tui (nec facta refringam
Dum mihi per venas spirabilis influet aer)
Maxima quam Cypanga, tibi clâssique patebit
Hospitio, si forte meis considerare regnis,
At si vicinas adpellere sederit Vrbes,
Arma rates victumque dabo. sic fatus, uterque
Complexu iungunt dextras & fœdera firmant.

Alter nigrantes intextis frondibus artus
Discolor hirsutumque caput; caput aureus alter
Cristata galea atque armis ardentibus artus,
Cetera dehinc epulas permixta impune iuuentus
Aggere in herbofo instituunt cumulataque ducunt
Pocula, pars naues, & grandia quadrupedantum,
Corpora mirantur, florentiaque agmina ferro
Pars velata notis pandentem cornua classem,
Ancora quam morsu stabilem fundauerat unco,
Tensaue non uno fluitantia flamine vela
Spiculaque, clipeosque & acute cuspidis hastas.

At non veliferis tantum Anacaona mouetur
Nauibus, Ausonio quantum in Ductore moratur,
Oraque, & augusta sublimes frontis honores
Suspicit, atque oculis totum cunctantibus ambit,
Et taci-

Et tacitum interea per venas concipit ignem
 Ac velut ardenti cui fusa a corde per artus
 Descendet toto iam iam ignea corpore febris,
 Nescius ille, leuem per & ossa arentia flammam,
 Perque resultantes sentit discurrere venas:
 Nec longum in medio tempus, cum languida membra
 Ecce ferus tenet ardor, & omni corpore regnat.
 Non aliter pesti Virgo deuota futura
 Iam nunc ignoti vires praesentit amoris,
 Inque nouas mentem deducit saucia curas.

Ductor ut attonitos rerum nouitatibus Indos
 Excitet, atque animis terrorem immitat inanem,
 Centum vicina suspendi è rupe columbas
 Imperat, & certo transfigier eminus ictu.

Ex templo ramis acerum connexa retortis
 In tenues aere ex solido deducta canales
 Arma citi arripiunt iuuenes, angustaue ferri
 Spiramenta caui contrito sulphure complent,
 Vnde aditus flamma: silicemque, & cetera postquam,
 Explorant: sibi quisque suam, quo dirigat ictum,
 Signat auem, penitusque oculos immobilis haeret:
 Tum rota tacta manu, vincloque exuta remisso
 Cum strepitu ruit, & silicem reuoluta prementem
 Obterit: illa repente micat, simul ignis, & ingens,
 Fit tonitrus: nam quo tenuis deduxit hiatus,
 Ignea vis immissa intus sulphurque, nitrumque
 Corripuit

*Corripuit, quæ pressa sinu tubus aneus imo
 Clauserat, atque aditu victrix spiravit aperto,
 Plumbea glans displosa leuicita turbine fertur :
 Diuisæ strident aura; tum certa volucrem
 Quæque suam ferit; illæ animas in rupe relinquunt,
 Precipitesque cadunt; plumas rotat aura reuulsas,
 Fumiferaque oculis lucem eripuerunt tenebræ.*

*Attoniti trepidare Indi, ceu fulmina cælo
 Dissiliant, campique solo labente dehiscant,
 Pars fugit, inque cauos sese abdidit auia montes,
 Littora pars legere, & celeri loca frondea cursu.*

*Vt primum cessit pavor, atque horrenda quierunt
 Murmura iam, fumusque euanuit ater in auras;
 Ingentem efferri galeam mira arte politam
 Imperat, hoc Narilum præstanti munere donat
 Christophorus monumētū animi et graue pignus amici;*

*Illic Fernandum in Mauros pia bella gerentem
 Prore communi, pro Religione tuenda
 Fecerat, & multo spirantem illuserat auro
 Docta manus; sociamque tori, comitemque laborum
 Reginam addiderat: tortis ibi criminibus Afros
 Non expectato rumpentes fœdera bello*

*Cernere erat, tumidosque instructo milite campos;
 Nox fauet, insidiasque umbris defendit amicis:
 Centum olli scalis aduersa in mœnia furtim
 Expositis, somno domitam, nec bella cauentem*

F

Irrum-

*Irrumpunt armis Zabaram, simul ilicet adsunt
 Pallentes Erebi pestes, quas orcus aperto
 Expuerat gremio, captaque immiserat urbi
 Exitium, flammæ illæ ferrumque ministrant,
 Inspirantque viris cades, fluit undique sanguis,
 Undique mors, nigra, luctusque in veste vagantur.*

*Parte alia diuos secum in pia praelia ducit
 Rex pius, Alhamanque inimico milite cinctam
 Obsidione leuat, illic trepidantia Maurum
 Agmina, magnanimi vultus horrescere regis,
 Aspiceres, cæcisque fuga se condere sylvis:
 Illum autem Zaharæ cades, temerataque templa
 Ultum armis, quò fata vocant, quò præuius anteit
 Armatas acies manifesta in luce Iacobus
 Candidus aurato clara inter nubila ferro,
 Pergere iter, Loscæque agros, atque oppida vastat:
 Debinc campos ingressus, aqua quos diuite Daurus
 Innatât, Illoræ cultu scedata profano,
 Tempia Deo dicat, & summa defigit in arce
 Signum immane Crucis, latæ longo ordine gentes
 Poplite procumbunt flexo, precibusque salutant.*

*Nec procul impositam sublimi vertice montis
 Obsedere arcem, præruptis aspera saxis
 Stant loca, difficilesque aditus, mæsta agmina circû
 Longo fessa labore sedent, cum protinus inter
 Sublimes nebulas, dextra Deus ipse nigrantem*

Flam-

*Flammam intorquet agens, ruit illa micantibus astris
 Turbinis in morem, totumque illapsa repente
 Moclinium inuoluit, missi simul aethere venti
 Spirantes aderant, infusaque flumina pesti
 Dant animos, volitant obscura in nube fauilla
 Ardentes, nimbusque ad sidera fumidus undat.*

*Hinc superum auxilio freti, & felicibus armis
 Mœnia Granatæ veniunt, densoque coronant
 Milite, non aditus clausæ, non exitus Vrbi
 Amplius, hic flauis undantia messibus arua
 Oppidaque, ac pagos dispersis ignibus vri
 Fecerat, & magnis quassatam molibus Urbem
 Certa noui dare signa metus, angustaque votis
 Tecta Deum, lataque vias effluere longo
 Concursum matrum lachrimis mœsta ora rigantum,
 Et pueros dextra implicitos ad templa trahentum.*

*Interea studiis sese concordibus omnes
 Exercent acies, pars alto in puluere giros
 Dat celeres circum, saltuque assurgit in auras
 Vectus equo, pars saxum ingens, aut missile ferri
 Pondus sublato longe intorquere lacerto,
 Pars signum immixtis certat contingere telis.*

*Nec non obsessæ prope mœnia conditur Urbis
 Sancta fides, pars templa nouant, pars aggere muros
 Cingere, & æquatas astris attollere turres,
 Pars fundare domos, opere omnis Boetica feruet.*

*Et iam finis erat bello, iam Bobdalis ultrò
Sceptrum Fernando, Regnique insignia mittit;
Ipse habitu, vultuque humilis ferrata recludit
Limina portarum, & venientes excipit hostes.*

*Ibant instructi ordinibus, Urbemque petebant
Magnanimi Heroes, caroque Isabella marito
Ad latus it, pulchra comitum stipata corona,
Atque animis sexum, curisque virilibus implet.*

*Pone subit procerum in medio Mendotius Heros
Albo inuectus equo, cui sacri insigne senatus
Tempora purpureo fulgent umbrata galero:
Illum candenti tenuissima velat amictu
Carbasus, & certo crispato ordine flexus
Centum agit errabunda, sacroque interserit ostro:
At circum extremas niuei subteminis oras
Finxerat argento, lauique inspererat auro:
Ipsam autem obducto credas transfulgere velo
Coccineam chlamydem, atque imis illudere plantis;
Hos equitum globus & peditum manus anteit ingēs.*

*Addiderat victo labentem flumine Daurum
Mollius, & nitido ludentes aethere centum
Pennatas puerorum acies: Procul inde tenebras
Horrendas visu, flammamque inamabilis Orci,
Illuc monstra Erebi Regnis expulsa receptis
Antiquas repetunt sedes, superosque relinquunt.
At furor angusta galea celatus in ora*

Post ter-

*Post tergum aratis compressus brachia nodis,
Arma super sedet, & victricia vincula mordet.*

*His Narilus gaudens donis (quāq̃ artis, & usus
Nescius) intentos oculos per singula voluit;
Bellaque, fortunaſque virum, atque ingentia facta
Miratur tacitus, neque honori cedit: at omnes
Partitur Cererem in naues, partitur & angues,
Quadrupedes angues, multo quos incoquit igne,
Et mensis tantum regalibus India ponit;
Addit aues, oneratque cadis agrestia vina
E Cerere, & pressis palmarum exhausta medullis.*

*At Ductor (neque enim mentem consistere rerum
Cura sinit) pelagi vada per stagnantia cœptum
Pergere iter parat, & terras lustrare propinquas:
Interea ne forte nouo Cypanga tumultu
Fœdera perrumpat, neu bella occulta tumescant;
Compactis turrim trabibus, vinclisque reuinctam
Arboreis textit saxoso in vertice rupis,
Sublimem, ingentem, pontesque insternit, & altas
Subjicit his fossas, & propugnacula circum
Tuta locat, munitque aditus: dehinc agmine centū
Deligit ex omni, curam quibus imperat arcis:
Magnaque ne Bacchi, Cereris neu copia desit,
Prouidet, & vigili disponit singula mente.*

*Senſerat hæc Erebi rector, vincique superbus
Impatiens, altum indoluit: tum lumina contra*

Ma-

*Magnanimum Ligurem, comitesq; ardentia torfit,
Et secum irato vix talia fundit ab ore.*

*Et potuit? nec quicq; unda, nec ventus, & arma
Profuerunt, comitumque metus, nec inhospita tellus
Cannibalum, nec dira fames, ne regna Quicque
Tangeret, optatisque Ligur consideret aruis?
Vicit, & imbelles iuga sub sua subdidit Indos,
Et maiora parat, credo mea vincla supersunt,
Namque aliud quid iam superest? iam fœdera iūxit,
Iam populos ditione premit, iam condidit arces,
Quin alias iter in gentes, noua tendere regna
Molitur, penitusque meos delebit honores:
Et patiar? quod si sententia cœlitibus stat
Certa, nouo Ligurem leges præfigere mundo,
Stat quoque certa mihi sententia regna tueri
Quæ mea sunt, nec cadam ideo, sed & obuius ibo
Ibo animis contra, Liguremque inimicaq; castra
Insequar, ipse mihi Deus, & spectantibus undas
Tollam iterum superis, euertamque æquora ventis,
Infandamque ipso submergam in littore classem,
Spargam iras, atq; arma iterū, nec vincar inultus.*

*Dixit, & horrendo toruum bis mugit ore:
Mugitu quo terra tremit, valesque resultant
Inferna, longeque caua intonuerè cauerna.*

*At subito excitum tenebris ardentibus omne
Spirituum genus, æterno quos æthere quondam*

Dispu-

Dispulit omnipotens, sedesque excussit ad imas,
 Multa reluctantes, belloque resistere adortos,
 Conueniunt, illis longæua in sæcula pœnis
 Exercere animas hominum data cura nocentes,
 Quos ubi confertos simul, atque in iussa paratos
 Vidit, ab accenso Dux talia pectore rumpit.

Nunc validis nitendum animis, nunc robore firmo
 O socij, ne noster honos, & gloria cedat,
 Aequalesque Deo vinci patiamur inertes,
 Cernitis ut pelagi tot magna per æquora vectus
 Quique iæ Ligur extremas penetrauit ad oras,
 Iam ritus dabit ille novos, antiquaque sacra
 Destruet, aequatisque solo nos trudet ab aris,
 Nostra etiam celebri victor captiua triumpho,
 Credo equidem, simulacra vehet, vinctique catenis
 Ante rotas Erebi densò ibimus agmine Reges,
 Terrarum domini, & cœli stellantis alumni:
 Nos qui bella Deum, socialiaque agmina contrà
 Contulimus, dubijsque pares certauimus armis,
 Nos igitur? nos mortali vincemur ab hoste?
 O tantum prohibete nefas, restinguite flammæ
 Serpentes, lapsisque simul succurrite rebus:
 Tollite pacatas ventis pignantibus undas,
 Inque ipso gentem, & naues submergite portu:
 Quin etiam ne forte meo quid restet inausum,
 Aut intentatum ingenio, præcingere flammæ

Re-

Reginam meditor, qua nulla ardentior unquam
 Virgineas cæco succenderit igne medullas:
 Haud labor hic ingens fuerit; se scilicet omnis
 Sponte sua in Veneris curas Quiqueia resoluit,
 Ipsaque adhuc tenero, nec plena ætatis, ab ungui
 Incastos animo meditari assuevit amores:
 Continuo dulcem venis sitientibus ignem
 Illa bibet, totaque ardebit mente Columbum,
 Quem iã amat ægra, nouũq̃ fouet sub pectore vulnus.
 Vt reor, orantem spernet, lachrymasque cientem
 Ferreus, & classẽ vicina ad littora vertet,
 Noui ego iam indociles mihi se submittere sensus.
 Vos facite indignam Virgo contempta repulsam
 Ferre rudis, seuas furibunda assurgat in iras,
 Quantum nec capere accenso sub pectore possit.
 Ergo armis, cælo quam nunc Ligur extulit arcem,
 Inuadat, lethoque viros absumat acerbo:
 Instigate odijs Indos, prauertite falsis
 Indicijs, rabieque animos accendite ferri:
 Et ne se medium paci offerat, armaque damnet
 Rex Narilus; prohibete, nouaque absterrite pugna:
 Nec dubito, iam vestra mihi sat cognita virtus:
 Sic Hispana solo inclinata repente ruet res,
 Sic spe frustratus tanta Ligur æquora rursus
 Trita petet: vos æquabit victoria cælo.
 Si tamen ulcisci socios temerarius armis

Audeat,

*Audeat, atque hostem toti se inferre Quiqueia,
 Bella placent; apta illa dolis erit area nostris:
 Quanta fames, quantus genti labor instat Ibera,
 Quanta per armatos ibunt incendia campos,
 Plenaque collectis ditescent Tartara prædis
 Christiadis aderunt superi: nec me altus habebit
 Somnus, & auxilio nostros tutabimur Indos,
 Nec quisquam in tanto rerum sibi cardine deerit:
 Vincet, cui dederit dolus, aut sua dextera palmam.*

*Dixit, & ut saui furijs incendat amoris
 Reginam, Asmodeo mandat, cui plurimus anguis
 Colla per atque humeros sinuosis flexibus errat:
 Illi cura data est sensus mortalibus agris
 In Venerem hortari, fœdisque exurere flammis
 Molle iecur: toto nulla est tam dira baratro
 Pestis, & egregijs hominum magis obuia cæptis:
 Innumeri cingunt comites, ignara quietis
 Suspicio, venasque igni suffecta Cupido,
 Cui Spes leta subit, flammaque alimenta ministrat.*

*Post hos tabescens macie, & vix ossibus hærens
 It Dolor, haud illi proprius comes, omnibus ultrò
 Addit se socium malesuadi pestibus orci:*

*Squalientes humeros, & membra exanguia palla
 Marmorea tegit, atque aliena in veste superbit.*

*Fama est, cum fraudes dedignaretur iniquas,
 Et versos hominum mores intacta Voluptas,*

*Ad superos terris nudam fugisse relictis,
 Exosumque genus misero cecisse dolori,
 Ille prius qui nunquam humiles attollere coram
 Audebat vultus, cæcæque in parte latebat
 Nudus, inops, iam se spolijs hostilibus ornat
 Spectandus chlamide in niuea, totumque per orbem
 Euolat, atque oculos mentita in imagine fallit.*

*Nec mora, iamque anima tenebrosa è sede rebelles
 Erupere una, & cælo incubuere sereno
 Protinus, ingenti fremitu, & stridentibus alis.*

*Sic caua præduris chalibum conflata metallis
 Aequatura arces, turritaque mœnia terra,
 Machina, si postquam mixto cum sulphure nitrum
 Excepit gremio, contrusoque obijce sepsit,
 Hauriat admotam graueolenti è fomite flammam,
 Dat crepitum, magnaue expulsa repente ruit vi
 Saxeæ pila ingens, & stridula dissecat auras,
 Arua tremunt, fracto cadere æthere sydera credas,
 Ecce procul diro percussa fulmine turre,
 Tectaque celsa iacent, stat fumo, & puluere cælum.*

*Interea Ligurum Ductor postquæ alta quiescunt,
 Velaque felices tendunt crepitantia venti,
 Certus iter celerare, sinusque aperire latentes,
 His dictis Regi socios commendat amico.*

*Inclyte Rex rerum decus, & tutela mearum,
 Dum populos alios, vicinaque littora tento*

Comm-

*Communem hanc turrim, & comites tutare relictos,
Et Ducis interea pro me precor accipe curam:
Sponte tuos illi monitus, tua iussa capebant,
Te Regem, dominumque colent, nomenque Columbi
Solum aberit, tutas defendent hostibus Urbes,
Littoraque, & vigili portus custode tenebunt.
Tu rerum ignaros solerti protege cura:
Me certe nunquam tanti meminisse pigebit
Officij, ingratumque tibi nulla arguet ætas.*

*Vix ea, cum subito Narilus: Dum vita manebit,
Fœdera, quæ tecum pepigi Dux magne manebunt,
Non si lapsa residat humus, non si æquora surgant,
Immotum solida quatient me mente ruina,
Solve metus omnes, rerum mihi cura tuarum
Semper erit, turrimque tegam, comitesque relictos,
Aeternumque tibi factis testabor amorem.*

*At modo te ventis ne regna occulta sequentem,
Ignotum penitus variarum ambage viarum
Fallat iter, pelagi quo non prudentior alter,
Quo te cunque feres, tecum hic meus ibit Alhetes.*

*Hæc ait, & lectum ripis fluuiialibus aurum,
Insuper Ausonio munus dat ferre Columbo,
Ille suos compellat, & hæc placido ore profatur.*

*Dum faciles spirant auræ, & maris unda silescit,
Vicinas penetrare Urbes, loca proxima Cuba,
Fert animus, vos interea quam struximus arcem*

Concordes colite o socij: Gonzalius armis,
 Consilioque ingens pacem, ac si dura feret sors,
 Bella reget Dux vester; ab hoc sit primus Amilcar.
 His Ducibus Caribes, & si quos aduena classis
 Huc procul externis ad prædam vexerit oris,
 Pellite, vos opibus sponte, auxilioque iuuabit
 Rex Narilus: nec vana fides, iam fœdera sanxit.

Hoc unum precor, ab vetitis ne forte rapinis
 Conscelerate manus; non his fundamina Regni
 Principijs iacienda noui, nec talia quondam
 Bissenii gessere viri, cum legibus orbem
 Fundarent: celebrate Deum, ritusque colendi
 Numina, mutatis paulatim inducite templis:
 Ipse adero, & meritis ingentia præmia reddam,
 Post reddet maiora Deus. sic fatus ad altas
 Tendit iter naues, sequitur quem cætera pubes.

At iussi quamquam tristes, quamq̃ humida fletu
 Abscessu Ducis ora gerant, comitantur euntem
 Vnanimis socij ad littus, quos prouidus Heros
 Inter iter non pauca monet; teque optime primos
 Gonzali, blandisque affatur Amilcara dictis.

O socij, quorum in rebus mihi cognita duris
 Sæpe fides & magna usu experientia longo
 Suasit, ut huic curæ, quæcunque erit illa, regenda
 Præficerem; nunc tempus adest, quo maxima virtus
 Vestra per ignotas spargat sua lumina gentes.

Principio

*Principio instabilis longe præsciscere sensus
Sit cura vobis populi: variatur in horas,
Ut pelagi facies, dubium, ac mutabile vulgus:
Adde quod hic rerum summas moderatur habenas
Fœmina, diuisi circumstant undique reges;
Forsit an aut rerum nouitas, suspectaue verax
Nostra Fides illos tacita inflammauerit ira:
Dissimulate metum interea, belloque parati
Viuite concordēs animis, pacemque fouete:
Quod si scēdisfraga vos iusta in prælia gentes
Forte trahent, armisque petent, insistite contrâ;
Hanc primum seruate arcem, spes omnis in illa est:
Bellaque dum in longum trahitis, dimittite certum,
Qui subito nostras hæc per mare portet ad aures:
Auxilio præsens adero, dabit India pœnas,
Et magno pacem hanc optabit forsit an emptam.
At si nulla dies sanctum inuiolabile scēdus
Fregerit, ut reor, atque utinam Deus orsa secundet;
Mollia ne soluat se segnis in ocia miles,
Procurate Duces: quot iam blanda ocia gentes
Exitio strauere graui, regnisque beatīs
Extrema steterunt caussa, cur victa perirent
Funditus exaquata solo? post ocia præda
Cæcus amor, Venerisque subit; ne pectora pestis
Heu premat hæc, dulci que irrepāt in ossa veneno:
Ergo omni studio gentem exercete quietam.*

Interea

Intera vobis *Narili*, procerumque benignos
 Conciliate animos, paulatim ritibus *Ultrò*
Assuescent nostris, melioraque sacra capeissent:
Auctor aget *Deus*, atque sui inspirabit amorem.
 Nam prius excelsis ardens in montibus ignis,
 Quam *Veri* longum lateat, nec se ipsa palam lux
 In cælum denso tenebrarum è carcere tollat,
 Hac, & plura dabat socijs precepta *Columbus*.

Talis iners senio durisque laboribus ager,
 Cum fragilem nato committit nauita cymbam,
 Multa docet pelagi insidias: si subdola rident
 Cœrula, & equatas somnus piger occupat undas,
 Quid faciat: quid mox, si contrahet horrida cælum
 Tempestas, nigrisque frement freta fracta procellis:
 Quid varius solis, quid luna nunciet orbis,
 Ille tacet, monitusque locat sub mente paternos.

Et iam dira phalanx *Stigijs* emissâ cauernis,
 Quo classem pelagi spumantibus obruat undis,
 Ingentes excire parat placido æquore fluctus.

Principio densæ solem inuoluere tenebræ,
 Quas grauido non terra sinu, non pontus in altum
 Expulit, at nigris *Erebi* deduxit ab antris
 Noctipotens legio, cæloque immisit aperto.
 Nec mora, consequitur picea caligine nimbus
 Secum hiemem, ventosque ferens: illi impete vasto
 Aequora diripiunt, naues, quæ sorte paratæ

Ponti-

Pontibus expositis stabant, reuoluta per altum
 Vnda vado refluyente rapit, rursusque resurgens,
 Ecce sinum ex longo trahit, atque ad littora maior
 Monte ruit, nauimque nigris illidit arenis,
 Credita quæ Ribio: cælum intonat, iætaque tellus
 Horrendum ingemuit, mediamque in fragmina littus
 Diuidit, illa viros cæcis exponit in undis,
 Quos frustra terræ adnantes vis incita venti
 Impedit, illisque relabens æquoris æstus.

At quas Pinxonus regit & senioris Herilli
 Dextera, crudelis vada per spumantia turbo
 Raptat agens: frustra trepidi succurrere nautæ,
 Et lheti vitare vias, omnem arbiter Orci
 Successum negat. Ergo undis furialibus actæ
 Dant pesti latus, & laxis compagibus imbrem
 Undique lethalem accipiunt: modo in astra feruntur
 Gurgite curuato, modo tartara in ima dehiscunt
 Precipites, fracto ceciderunt carbasa malo,
 Et clauos nigra secum abstulit impetus vnda,
 Crescit aquæ furor, & scelerata insania venti.

Tum Ductor casu mentem percussus acerbo
 Ingentes cumulare preces, superosque vocare
 Auxilio; Siquid gentis te cura remordet
 Christe tuæ, ser opem, & socios, classemq; benignus
 Respice, namque potes, præsentique eripe ltheo,
 Tantum effatus, & ætheria demissus ab arce

Alatus

*Alatus iuuenis, classem cui cura tueri,
 Venerat imperio summi Patris; ilicet omnis
 Sæua cohors Erebi cæcis effusa tenebris
 Intremuit: neque enim minit antem, & dura ferentē
 Iussa pati, aut notis obsistere viribus ausi:
 Mox paribus nitens hæc nuncius edidit alis.*

*Quis furor hic? quæ tanta repens audacia surgit
 Bis victum, genus & vanas ardetis in iras?
 Nec dum etiam vestri sat nota potentia Regis;
 Ite nigras barathri in sedes: non æquora vobis
 Adscripsit Deus, aut habitandas aeris oras,
 Ite datas, ite in tenebras. Nec plura, morantes
 Desuper urget agens, vibrataque increpat hasta,
 Olli abeunt, cælumque leuant: tum protinus ingens
 Ventorum posuit fragor, ac tumida vnda resedit,
 Et iam molle salum Zephiri leuis innatat aura.*

*Obstupere animis Indi. Tunc sydera Ductor
 Aspectans, tendensque manus. Tibi maxime ponti
 Rector, ait, Christe omnipotens, nunc debita rursus
 Nostra salus: tu nos tot per maria aspera tutos
 Aduehis huc, placidaque facis tellure potiri:
 Tu modo præsentis servas a funere classem:
 Perge precor, nostrosque iuues ubicunque labores,
 Terrarum, pelagique potens, atque ætheris author.*

*Hæc ait, & lachrimis oculos subfundit obortis,
 Amissisque animo comites miseratur amico.*

Con-

*Continuo Canoas Indi insiluere cauatas,
Auxilioq; volant; clasisque in tuta reducunt,
Fragmina, reliquias pelagi, clauosque, rudentesque,
Instabilique legunt fluitantia marmore vela.*

*At Ductor quā speret opē, qua nam arte carinas
Iam laceras iterum adificet, sub pectore voluit
Tristis, & ardenti curarum fluctuat unda.
Ipse viam ostendit Narilus: prope littora surgit
Ardua silua ingens, montemque, & frondea late
Arua tenet; hanc immisso prosternere ferro
Edocet, inde legi reparande accommoda classi
Robora. iam sumptis exercitus omnis in armis
Consilium exequitur Regis, cœloque minantes
Obtruncant Mamysos, non se magis altera dulces
Induit in fructus arbor, mentitaque morum
Guaiaha, præcipitemq; dedit Guanabana ruinam,
Non illam pressos terra curuantia ramos
Poma niuis grauida, squammisque equalibus apta,
Non virides iuuere comæ: cadit & bona bello
Xagua, pugnantum fixis hæsuræ medullis,
Dadala si manus in longas deduxerit hastas:
Iam labem traxit Cocyus, nascentibus idem
Si folijs, natisque decor sit fœtibus idem,
Palma erat: & largas grate potantibus umbra
Euersas altis imponunt curribus Hobos.
Te quoque dura manus terra deturbat Huyace
H Aeter-*

*Aeternis formosa comis, virtutibus ingens
 Sancta arbos, decus inuenti, & noua gloria Mundi:
 Nescia quantum olim auxilij, certaue salutis
 Ferre paras agro venturis pestibus Orbi:
 Cum delapsa lues corrupto ex aethere, primum
 Gallorum per bella, Italas irrumpet in Vrbes,
 Nomen & à gente accipiet, mox crescet eundo,
 Auctaque per populos caput altius efferet omnes.*

*Et sterilis pinus, & glandibus utilis ilex
 Eruta supremum ingemuit: procul intonat aquor,
 Frondiferasque domos pauide liquere volucres.*

*Postquam vulneribus crebris euicta resedit
 Sylua solo, plaustisque inuecta gementibus omnis
 Materies tandem ad littus, tunc cura nouanda
 Classis Amaracino Liguri datur: ille quietis
 Nescius urget opus, noctemque laboribus addit,
 Et laxas mira arte trabes, lacerasque retexit
 Compages laterum, cuneisque adstringit ahenis.*

*Atque ea dum properat; digressu mæsta Columbi
 Anacaona dolet, pelagumque insurgere rursus
 Vellet, & inuisas absumi fulmine naues;
 Et penitus patria reges exosa Quiqueia
 Se propriam huic dicat, & tædis adiungier ardet:
 Illa quidem à caro numquam sitientia vultu
 Lumina declinat, nec quenquam ex agmine tanto
 Magnanimum præter Ligurem videt; illius omnes
 Suspen-*

*Suspensa bibit aure sonos, illum arma gerentem,
Depositisque armis unum miratur, in unum
Usque inhians oculos iucundo pascit amore.*

*Ast ubi nox terras nigris amplectitur umbris,
Aut sibi de caro tantum Duce somnia querit,
Aut longam in lachrimas trahit, & suspiria noctem.*

*Talibus ardentem curis, animoque furentem
Inflamat magis Asmodeus, stimulisque fatigat:
Magna parat; notum quid amans, quid semina possit.*

*Ergo per noctem dilecti nuntia vultus
In somnis misera simulacra immittit amanti,
Undantemque animum exagitat; trahit illa furorem
Ossa per, & venas, cacoque in pectore gliscens
Non iam se capit ignis; hiat vesana mali vis,
Perque oculos fluit in lachrimas, mox somnia mente
Dum repetit, vanaque animum dulcedine pascit,*

*Talia secum ardens. Utinam me nocte perenni
Vinciat alta quies: vita, non mortis imago
Illa futura mihi, somnus si talia semper
Visa feret, mecumque aderit mea vita Columbus.
Quid loquor? instabili quid in hospite, cuius, ut ipse,
Errat amor, mentem defigis regia Virgo?
Scilicet is; patrie quem non aspectus, & agri
Nec prece, nec lachrimis forsitan tenuere parentes,
Externa ne sede lares mutaret auitos,
Nauis fragumque fretum, & pelagi truculenta subiret;*

Scilicet is molli sensus submittet amor?
Illum ego crediderim, potuit qui talia, cautes
Duritie, tumidique undas euincere ponti:
At non hac Dux magne oculi, moresque dedere
Signa tui, seuam nec pulchro in corpore mentem
Credibile est posuisse Deos: quod si aspera ferro
Corda geres; blandaq; preces, lacrimosaq; flectent
Verba reluctantem: nec certe ego digna repelli:
Ten' igitur subiecta tibi Cypanga videbit
Tendentem regina manus, gemitusque cientem
Fœmineos? quam non promissa ingentia Regum,
Non humiles flexere preces, non dona procorum,
Coniugio tantos ut dignarere maritos;
Nunc liguri te sponte offers, alienaque lecti
Vincla subire paras? quid si te spernat, & agram
Deferat alta petens mansuescere nescius hospes,
Et tua dicta idem ferat, & sua carbasa ventus?
Tunc numquam tales tetigisse optabis amores
Nequicquam, & seris assurges vana querelis.
Cur ego me tristi augurio, cur omine lauo
Prosequor? haud talē (neq; enim nox nescia veri est)
Somnia promittunt: ignoti tadia ponti
Scilicet, erroresq; vagos, alienaque regna
Preponat proprio imperio, & dotalibus Indis:
Ille meas potius lacrimas, vocesque benignus
Audiet, & mecum hic concordēs exiget annos
Tunc

Tunc Duce sub tanto nostri se extendere fines
Imperij supra Cubam, super ultima longe
Littora Iamaica aspiciam, frustra^q feroces
Cannibali nigro fœdabunt tela veneno.
Ipsa humiles inter populos, gentesque subactas
Septa armis, solioque alte subnixa superbo
Et colar, & felix mirando coniuge dicar:
Quod si forte alias classem conuertet ad oras,
Per freta longa sequar, casus quicunque manebunt,
Semper erit caro comes Anacaona Columbo.
Pone metus, accinge operi, flammisque fatere
Ipsa tuas; equidem huc tot vasta per æquora vectam
Crediderim Cemijs classem venisse secundis.

Sic ait, atque animum, felicibus ebria curis
Speque tumens, placito permittere certa furori,
Ut faciles aditus, & mollia nacta loquendi est
Tempora, nunc blandis Ductorem affatibus ambit;
At simul ut caro defixit lumina vultu,
Admirans silet, obtutuque immobilis hæret
Incipit, at fauces vox interrupta relinquit,
Inuitam^q premunt lachrimæ, & suspiria linguam:
Nunc venti infidi furias, quos æquore fluctus
Excierit, quanto classis demissa periculo
Commemorat, tum ne dubio se credere ponto,
Ne velit ignota caput ultro opponere morti,
Hortatur, miscetque preces, lachrimisque fatigat
Cunctan-

*Cunctantem, & varijs assultibus irrita tentat;
 Mox sic canentem dictis affatur Inaspim,
 Qui tenero magna custos infantis ab auo,
 Regina multo ante alios dilectus amore.*

*O mihi iam longo perspecte Inaspis ab usu,
 Aetatis qui lora manu fluitantia prima
 Rexisti, cura amplexus me pæne paterna;
 Dum thalamum magni, quos hæc habet Insula, reges
 Certatim petiere meum, tu semper operti
 Conscijs, interpretisq; animi, rectorq; fuisti,
 Numquam, ut scis, equidem; seu sic fortuna ferebat,
 Seu vis alta Deum, qui regna hæc nostra tuentur,
 Regum animus, quibus est, pacesque, & praelia cura;
 Numquam equidẽ mentẽ his potui submittere tadis,
 Quin tanti me propositi laudare tenacem
 Sæpe soles: nunc sollicitam cura altior urget,
 Quam noctis turbata quies, somnusq; per umbras
 Ingeminant: hæc verba Ducis, vultumq; Columbi,
 Et mores animo referunt; inuita fatebor,
 Ni tamen ipsa meos impellunt numina sensus,
 Fixus hic insedit menti: sit dignus amari
 Ille licet; nam cui tantum decus enitet ore?
 Nam cui maior inest iuuenili in pectore virtus;
 Ipsa tamen Cemys obstare volentibus ausa
 Non semel ardentes tentavi extinguere flammæ:
 Hoc magis increuere, imisque hæsere medullis,
 Nunc*

Nunc timeo, mea ne superos auersa voluntas,
In furias, rabiemq; trahat, quibus insuper equum
Reddere me grates, & dona offerre fuisset,
Vxorem tanto quod me legere marito;
Qui socijs, & classe potens terrestria secum
Fulmina habet, quibus igne tonet, victorq; Quiqueiã,
Iamaicamq; omnem sub iura Cypangia mittat;
Ergo ne nostris nunc soluere tentet ab oris,
Sum verbis aggressa Ducem; nihil ille moueri,
Seque parare via: quod si cœpta effera firmet
Exitus, ecquid erit misera mihi, solus hic omnes,
Dum loquor, excussit timor agro e pectore sensus,
Faucibus & vox fracta hæret: tu, cuius & annis,
Assuetaq; malis equum est me fidere menti,
Quam potes, affer opem: flammam non sponte recepi,
Quæ nunc aucta mora possesso in pectore regnat.
Quod si hæc mēs Cemio est immota, nec obstat Hayti
Gloria, quæ magnis se attollet in athera rebus,
Ipse viam inueniet. Nec plura effata quieuit,
Totus & in vultu patuit dolor; atque ubi paulum
Conticuit, contra sic est exorsus Inaspis.

Quod te cara mihi; atque eadem Regina volētem
Exhibeas, penitusq; animi interiora recludas,
Iure facis: nostro totum hoc debetur amorī,
Quo te nascentem excepi, qui creuit in annos,
Auctaq; cui, quantum tibi roboris, addidit ætas;

Non

Non ego, thesauri quamuis prædiues auiti,
 Imperijque potens sibi Guarionexius ultro
 Te iungi tædis properet, omnesque Quiqueia
 Certatim tua magna petant connubia Reges;
 Tantorum quemquam è numero legisse procorum
 Te thalami comitem optavi: tua forma, Cemumque
 Nobilitas de gente, Cemis tua proxima virtus,
 (Quam partem, cum sis mea sola, & maxima cura,
 Iure mea iuuat interdum me dicere cura)
 Longe alios meruere viros: hic, cuius & oris
 Maiestas, visque alta animi non semine nostro
 Ostendere satum, te dignior omnibus vnus.
 Atque utinam Diui spirent in vota secundi,
 Quos ego te primum precibus, donisque per aras
 Sollicitare velim: nihil ò regina volenti
 Difficile, inuictumque Deo, qui sæpe labores,
 Et curas hominum euentu frustratur inani,
 Vt superum memores votis aterna fatigent
 Numina, diffidantque sibi: nec fidere tantum
 Fas precibus, bonus optatis dum defluat alto
 Finis, ut interea penitus sedeamus inertes.
 Tu Cemios per templa voca, mihi sit labor omnes
 Explorare aditus, omnemque impendere curam
 Vt Ducis Ausonij mentem, ac corda aspera frangã.
 Sic ait, ardentemq; animum per plurima voluit.
 Ergo votinas indicit sacra per aras,
 Cinctaque

Cinctaque virginea comitum regina caterna
 Ad numerū canit, inq; orbem pede prapete pernix
 Pellit humum, lato socia clamore sequuntur
 Crura coloratis incincta & brachia conchis.

Primus it agmen agens picto Boitius ore
 Horrendus, lateri pendent cui tympana lauo;
 Ille manu Cemium sublimi in sede videndum
 Collocat, hinc ara cerealia liba per artem
 Secta, rosasque offert, templo quæ mystica matres
 Munera textilibus secum aduexere canistris.
 Tunc genibus super incumbens regina reflexis,
 Non audituros vocat in vota irrita Cemos.
 Sancte ferum semel ò sublimi tange flagello,
 Marmoreosque animos, & ahenea pectora rumpe.

Interea formas sese mutauit in omnes,
 Inque preces omnes senior descendit Inassis,
 Molliat ut sanas Ducis intractabilis aures,
 Ille iter excusat, caussasque adiungit eundi,
 Scilicet hoc mentem, regisque haud mollia iussa
 Edocet esse sui, quæque hos portarat in usus
 Ludicra dona dari populo iubet. ilicet olli
 Candescens vitrum, & pellucidulam crystallum
 Conflatam in miras diuersa ex arte figuras
 Accipiunt, versantq; manu, nec imagine pascunt
 Quantum oculos fragilis candenti in luce metalli
 Dum proprios speculi mirantur in æquore vultus

I

Vitraque

Vitraq;ue inoffensos transmittunt splendida visus.

*At postquam cura insomni assiduoq; labore
Instaurata ingens stetit alto littore classis,
Lentaque deductæ texerunt marmora naues,
Certus inire viam ac lustrata relinquere regna
Christophorus, classem conscendi, & castra moueri
Imperat, innumeras frustra Anacaona morandi
(Ingenium timida furor inspirabat amanti)
Innectit causas, luctusq; incendit amarus
Nequicquam, nullis animum quippe ille mouetur
Vocibus, & lacrimas auersa respuit aure.*

*Tum vero sedata genas, & pectora virgo
Scissa manu, fletuq; oculos accensa tumentes
Ibis, ait, nec te quicquam Anacaona mouebit?
Ibis, & immiti morituram funere linques
Crudelis? quo tendis? & extera littora queris?
Quin etiam dum seuit hyems, turbata procellis
Per maria ire paras, quid si deserta ferarum
Saxaque Cannibalum fugeres? tua regna relinquis
Meque fugis, saltem ah, si te fastidia nostri
Tanta tenent, spatium precor, exiguaque furenti
Da requiem, dum speratos perferre dolores
Fortius ediscam, non, tu cum nostra subires
Littora, & ignotos intrares aduena portus,
Bella tuli, & prima vetui considerare terra,
At si nulla tua tangit te cura salutis,*


Firmaque


*Firmaque adhuc animo sententia perstat eundi,
Me quoque fer tecum, & spumosas tolle per undas,
Hoc precor, exiguum hoc munus moritura reposco.*


*Talibus orantem, lacrimis immobilis Heros
Multa dolens, agramq; animi solatus amantem,
Deferit. At postquam facientem vela Columbum
Illa videt, certumque abitus, correpta dolore
Exanimis cadit, atque oculos nox plurima preßit
Excipiunt famula, manibusque in tecta reportant
Regia, pallentem, ac gelido sudore fluentem,
Et tacitos imo questus sub corde cientem.*

FINIS LIBRI SECVNDI.









4590
5824c

c

